

《子平母法·大流年判例》(3) 医家五行总决 | 下篇

水太冷子 安心粥 今天

收录于话题

#子平母法·大流年判例 3 #好好读书 4 #四柱八字入门 5



论曰：

康泰生于和合，疾病起于刑伤。

究五行衰旺之理，推百病表里之详，内应五脏，外属四肢。

且如木气休囚，两鬓消疏而稀发。火临死绝，双瞳昏暗而无光。

火中隐土少水制，则心神恍惚；木下藏金无火救，而腿足损伤。

甲乙兑生逢壬癸，醉乡而死。丙丁坎育遇庚辛，沟港而亡。

水盛木浮，多生泄痢。土重金埋，常病气高。

诸风掉眩，乙木旺而辛金衰；疼痒疮疡，丁火盛而癸水弱；痞塞肿满，只因己土太过；愤郁病痿，盖为辛金不及。

耳目聪明癸水旺，寒邪拘缩肾经虚。

甲乙能伤戊己，无救而缺唇；丙丁善克庚辛，少制而暗哑。

火中有土，项生瘰癧之灾；水中有土，腹患蛊肿之病。

用神受制而被刑，亡于棒杖；上下逢鬼而无救，死作悬梁。

四柱重冲多凶而他乡丧体，五行衰败不足而瘟疫亡身。

水败腰驼，莫用轩岐之法；金刑龟背，安施卢扁之方。

庚辛气秀，西方见木而亡于兵刃；甲乙败绝，坤南无水，而骨肉飞。

辛巳、丙申遇刑，臂虚而人生六指；己卯、戊寅逢敌，胃弱而常病疮疽；

乙未、甲午逢金，人多鳌头；癸卯、己丑相刑，病生腰膝；

甲申、乙酉，幼年多病肝经；辛卯、庚寅，晚年劳伤筋骨。

丙火上炎，丈夫每忌于身心；丁火下湿，女人虚癆而血产。

日時衰敗，大患難療；干支刑害，小疾不療。

氣相得而安和，氣相逆而災殄。

病症不离于六脉，死生难越乎五行，细究兴衰，万不失一。



古歌曰：

戊己生时气不全，月时两处见伤官；必当头面有亏损，脓血之疮苦少年。

日主加临戊己生，支辰火局气熏蒸。冲刑克破当残疾，发秃那堪眼不明。

丙丁日干五行衰，七煞加临三合来。升合日求衣食缺，耳聋残疾面尘埃。

壬癸重重叠叠排，时辰设若见天财。纵然头面无班癞，定主其人眼目灾。

丙丁火旺疾难防，四柱休囚辰巳方。木火相生来此地，哑中风疾暗中亡。

又曰：

人之生也，受气于父，成形于母。五脏和平者无疾，战克太过不及者主疾。

《内经》云：

东方实西方虚，泻南方补北方。

东方实者，木太过也；西方虚者，金不及也；

泻南方者，火太过也；补北方者，水不及也。

是以五行太过不及，皆主疾也。

若水升而火降，火降而金清，金清而木平，木平而土不及克，五脏各得中和之气，疾病何自生焉？

《阴阳书》：

金刚火强，自刑其方，木落归本，水流趋东。

所以论三刑，刑则残害，言太过而身疾也。若只取不及为疾，必有一偏之失。

凡五行有死绝而成疾者：水死绝，多肾气腰足攻注，滑泄便溺不利之疾；

火死绝，主肠气结塞、惊悸健忘，精神不安之疾；

木死绝虚风目涩眩暈，筋急、爪甲枯悴、喜怒颠倒，择饮择食之疾；

金死绝，主气虚喘急、咳嗽、皮毛焦燥干嗇、骨节疼痛、涕泪、大肠泄痢、便血之疾；

土死绝，主面黄、减食、隔噎吐逆、肢体怠惰、喜卧嗜睡、多思虑、耳聋、神浊健忘、少喜动作之疾。



有相克而成疾者：金火相克，生旺则瘍疮癰肿，死绝则癆瘵呕血；土木相克，生旺主疲闷昏眩、风麻、小肠疾痛肿，死绝主吐食症块，疽癖积滞之疾，或主中风；金木相克，生旺主肢足骨节不完、眼目之疾，死绝主气虚精脱、癆疾瘫痪之疾；水土相克，主脾湿泄泻、中满痰嗽不利之疾。

有相生而生疾者：火木相生，生旺则上盛隔壅，目赤头风；死绝则伤寒作狂、闷乱疾。火土相生，生旺则胃实；死绝则唇焦红气、热结大便不利。金水是相生，生旺则气滞，死绝则晴滑；水木相生，生旺则呕吐胃虚；死绝则精败、伤寒粘疟。金土相生，生旺则多虚无肌肉死绝肠鸣蛩作。

凡水土木相逢于无气之处，主蛊气肠胀、吐逆之疾；凡金水火相逢于无气之地，主痢疾，金主大肠，水火守之，阴阳不和也。

凡水逢土，多主翻胃疾；土多而无水气疏之，主聋聩疾。盖肾水不流则翻胃，气不能则为聩也。

又曰：

凡论残疾病症，先论日干，次详月令，然后通年时看之，伤官主残疾，煞重亦然。

乾卦在亥，亥为天门，六辛生人得此日此时，多主盲聋。

亥属肾，肾通耳，丙火遭水克也；

子位坎宫，伤官煞重相刑，主下部疾；

寅宫艮土，主脾胃，面色痿黄之疾；辰属震；

此月带伤官，少年主多惊疾，盖震者动也。轻则主惊脾胃疾，重则主足疾。

巳为巽，伤官煞重，主妇女血气不调，劳疾；

午为离为目，伤官煞重，主失明头风之症；

申属坤。为众阴，伤官煞重，主腰脚筋骨之疾；伤官伤尽者不在此论；

酉为兑，属口齿不完之疾。

戌为火库，主下血痔漏之疾。

丑未伤官，亦主脾胃。

伤官煞旺者，年年病瘟，主用上下战克、五行无救助，主身体不完，头面残伤。



《赋》云：

申中无气遇寅战，头目偏斜；乙丙有刑遇辛伤，每朝发祸。

炎火盛水而灭，眼目多昏；虚土旺水而崩，肚肠蛊肿。

丙中藏土，人多火眼；己到震方，定主缺唇。

土受木制，乃多脾胃之灾；木被金伤，筋骨疼痛之患。

水土相刑无救助，定有失步之虞；金火相刑为鬼煞，多应上喘之疾。

壬癸戊己相扶，难听音乐；丙丁壬癸相随，乍辨青黄。

时来克日，肢体难完；水若遇刑，头面易损。

若上下鬼克都临死墓，土临甲乙，死于呕吐之中；火局庚辛，绝在心气之病；水东肾虚临身；金北骨
癆加体；木南风气为灾。

更看空亡、五墓、元辰、七煞，如遇死绝，难保性命。

又曰：

凡一切诸煞亦有主疾者，劫煞主小肠，又主耳聋、咽喉疾；

官符主腰脚疾；咸池主酒色、劳瘵、脓血、便溺疾；

赘耗主暗昧，或赘疣疾；

飞廉名天瞽，支干无气，主无目。

凡禄因食致疾，须带煞克身方是。

凡命见真冲气散，或真刑气散，多是废疾之人。甲辰、甲戌、乙丑、乙未，土木交加，主瘫痪之疾；丙申、丁酉，金火交加，主血筋所伤；戊子、己亥，水土交加，主脾胃之疾；庚寅、辛卯，金木交加，主筋骨劳嗽之疾。癸巳壬午丙子丁亥水火交加，主头面目疾。

《烛神经》曰：

日被时克莫相对，终是艰辛病祸缠。

金木战兮忧病骨，水凌火气眼生烟。

金水死兮为风癱，土多水少败丹田。

土遭木克脾胃弱，火胜金残血里眠。

水深金重逢水厄，遇水定教落深渊。

水少火多应受渴，火多土少语狂颠。

水若深兮火若明，水满火明寿难延。

金绝切忌四肢损，土多带火受忧煎。

木若盛时应蹇塞，更须仔细辨根源。

《广信集》云：

凡命禄对冲，一辰如坐命宫或疾厄宫，主人手足有缺、身体不完。

六厄亦系名曰互战。辛卯日時名曰白虎閉目，火年必損眼。

其餘辛與卯字者亦忌之。

《壺中子》云：

金衰火盛嘔血，不爾脫肛；

水竭土盈病癰，忽然耳聾。

沈芝云：

破碎羊刃招殘疾，疾宮六害還非吉，

日時累犯旺鬼凌，無氣空亡纏病卒。



喜欢此内容的人还喜欢

《子平母法·大流年判例》(1) 女命十干诀

安心粥

云顶之弈热补丁阵容排行榜！欧服王者登顶战神奥拉夫最强玩法！

兔顶之弈

美已出手，真正的暴风雨将至！中国应如何应对？（强烈推荐）

北大总裁俱乐部